

Oktòb 2011

konferans jeneral

Pito nou gade anlè

Ekspyasyon

atitid

lafwa

obeyisans

konfyans

konferans jeneral

Pito nou gade anlè

Pa Eldè Carl B. Cook

Nan Swasanndis yo

Si nou, menmjan ak Prezidan Monson, egzèse lafwa nou e chèche èd Bondye, nou p ap akable pa fado lavi yo.

Nan fen yon jounen patililyèman fatigan prèske nan fen premye semèn mwen kòm Otorite Jeneral, valiz mwen te chaje e lespri m te preyokipe avèk kesyon “Kijan l ap posib pou m fè tout sa?” Mwen te kite biwo Swasanndis yo e mwen te antre nan asansè Bilding Administrasyon Legliz la. Pandan asansè a t ap desann, tèt mwen te bese e m t ap fikse atè a.

Pot la te louvri epi yon moun te antre, men mwen pat leve tèt mwen. Pandan pòt la t ap fèmen, mwen tande yon moun mande: “Kisa wap gade atè a konsa a?” Mwen te rekonèt vwa sa a, sete Prezidan Thomas S. Monson.

Byenvit mwen te leve tèt mwen epi m te reponn: “O, anyen.” (Mwen si ke repons entelijan sa a te enspire l yon gwo konfyans nan kapsite mwen!)

Men li te wè ekspresyon enkyè mwen ak valiz chaje m nan. Li te souri epi avèk amou li te sigjere, pandan l te pwente dwèt vè syèl la: “Li pi bon pou w gade anlè!” Pandan nou t ap desann yon lòt etaj toujou, li te jwayezman eksplike m ke li te sou wout pou al nan tanp lan. Lè li te di m orevwa, fason l te gade m nan te sanble pale ak kè m pou di ankò: “Pa bliye, pito ou gade anlè.”

Pandan nou t ap separe, pawol yon ekriti te vini nan lespri mwen: “Kwè nan Bondye; kwè ke li egziste....; kwè li gen tout sajès, ak tout pouvwa, ni nan syèl la ni sou tè a”¹ Pandan m t ap reflechi sou pouvwa Papa nou ki nan Syèl la ak Jezikri, kè m te jwenn rekonfò mwen t ap chache anven atè a nan asansè ki t ap desann nan.

Depi lè sa a, mwen medite sou eksperyans sa a ak wòl pwofèt yo. Mwen te akable anba yon fado e m te bese tèt mwen. Lè pwofèt la te pale, mwen te gade li. Li te redirije atansyon mwen pou m leve je m gade Bondye, kote m te kapab jwenn gerizon ak fòs atravè sakrifis ekapyatwa Kris la. Se sa pwofèt yo fè pou nou. Yo dirije nou vè Bondye.²

Mwen temwanyè ke Prezidan Monson se non sèlman yon pwofèt, vwayan ak revelatè; li se yon meveye egzanp tou nan viv prensip pou leve tèt nou gade anlè a. Plis pase tout moun, li te gen dwa santi l akable anba pwa responsablite l yo. Men olyesa, li egzèse gwo lafwa epi li ranpli avèk atitid pozitif, sajès, ak lanmou pou lòt moun. Atitid li se yon atitid ki di “nou kapab fè l” e “n ap fè l.” Li gen konfyans nan Senyè a epi li konte sou Li pou fòs, e Senyè a beni li.

Eksperyans ansenye m ke si, menmjan ak Prezidan Monson, nou egzèse lafwa nou epi chèche èd Bondye, nou pap akable anba fado lavi yo. Nou pap santi nou enkapab pou nou fè sa nou te aple pou nou fè oubyen sa nou bezwen fè yo. N ap jwenn fòs, epi lavi nou ap ranpli avèk lapè ak lajwa.³ N ap vin reyalize ke anpil nan bagay ki preyokipe nou yo pa gen enpòtans etènèl, e si yo genyen, Senyè a ap ede nou. Men nou dwe gen lafwa pou nou leve je gade anlè ak kouraj pou nou suiv direksyon Li.

Poukisa li difisil pou nou toujou gade anlè nan lavi? Petèt nou manke lafwa nan lefèt ke yon aksyon osi senp kapab rezoud pwoblèm nou yo. Paregzanp, lè sèpan pwazonen yo te mòde pitit Izrayèl yo, Moyiz te kòmande yo pou yo leve yon sèpan an ajan sou yon bwa. Sèpan ajan an te reprezante Kris la. Tout moun ki te leve tèt yo gade sèpan an jan pwofèt la te kòmande yo a te geri.⁴ Men anpil nan yo pat gade, e yo te peri.⁵

Alma te dakò ke rezon k fè Izrayelit yo pa t leve je pou gade sèpan an sete paske yo p at kwè ke sa t ap geri yo. Pawòl Alma yo aplike pou nou jodia:

“O, frè m yo, si sèlman, vire tèt nou gade te kapab geri nou, èske nou pa t ap vire tèt nou byen vit? Oubyen, èske nou ta pito fè kè nou di nan enkwayans epi pou nou ta fè endolans, pou nou pa ta gade, pou nou kapab peri?”

“Si se sa, malè ap rive nou; men si se pa sa, voye je nou gade epi kòmanse kwè nan Pitit Gason Bondye a, kwè li gen pou l rachte pèp li a, li gen pou l soufri epi pou l mouri pou l kapab ekspye pou peche yo; epi li gen pou l leve ankò nan pami mò yo.”⁶

Ankourajman Prezidan Monson pou nou leve je gade anlè a se yon senbòl pou nou sonje Kris la. Lè nou sonje Li, epi kwè nan pouvwa Li, n ap resevwa fòs atravè sakrifis ekspyatwa Li a. Se atravè fason sa a nou kapab soulaje anba sousi, eprèv ak soufrans nou yo. Se atravè fason sa a nou kapab jwenn padon epi jwenn gerizon anba soufrans peche nou yo lakoz yo. Se atravè fason sa a nou kapab resevwa lafwa ak fòs pou nou andire tout bagay.⁷

Sa pa gen lontan, Sè Cook ak mwen te asiste yon konferans pou fi yo nan Afrik Disid. Apre nou te fin tande kèk mesaj enspiran sou fason pou aplike sakrifis ekspyatwa a nan lavi nou, prezidan Sosyete Sekou pye a te envite tout moun pou soti deyò. Yo te bay nou chak yon balon byen gonfle. Li te eksplike ke balon an te reprezante tout fado, eprèv ak difikilte ki t ap trakase nou nan lavi nou. Apre yo te fin konte rive sou twa, nou te lage balon nou yo, ki vle di “fado” nou yo. Pandan nou te leve tèt nou ap gade fado nou yo ki ta prale, te gen yon son soulajman “Ahhhhh.” Ti aksyon senp lage balon nou an sete yon bèl rapèl de lajwa enkonparab ki vini lè nou leve je gade epi panse ak Kris la.

Kontrèman ak lage yon balon gonfle, esprityèlman leve je gade anlè se pa yon eksperyans yon sèl fwa. Nou aprann nan priyè sentsèn nan ke nou dwe toujou sonje Li epi respekte kòmandman Li yo pou nou kapab toujou gen Lespri Li avèk nou chak jou pou gide nou.⁸

Lè pitit Izrayèl yo t ap ere nan dezè a, Senyè a te gide vwayaj yo chak jou lè yo te vire vè Li pou direksyon. Nan Egzòd nou li, “E Senyè a t ap mache devan yo nan yo gwo nwaj ki te gen fòm yon poto pou moutre yo chemen pou yo pran e lannwit li t ap mache devan yo nan yon dife ki te tankou yon flanm ki t ap klere yo.”⁹ Direksyon Li te toujou la, e mwen rann nou temwanyaj enb mwen ke Senyè a kapab fè menm bagay la pou nou tou.

Konsa, kijan l ap dirije nou jodia? Palentèmedyè pwofèt, apot, ak dirijan pretriz yo epi atravè santiman nou resevwa lè nou fin devèse kè nou ak nanm nou bay Papa nou ki nan Syèl la nan lapriyè. Li dirije nou lè nou abandone bagay mond lan, repanti epi chanje. Li dirije nou lè nou respekte kòmandman yo, epi eseye vin plis tankou Li. E Li dirije nou atravè Sentespri a.¹⁰

Pou nou ka jwenn direksyon nan vwayaj lavi a, epi jwi konpayi konstan Sentespri a, nou dwe gen yon “zorèy ki tande” ak “je ki wè,” toulède dirije anlè.¹¹ Nou dwe ajì selon direksyon nou resevwa yo. Nou dwe leve je gade anlè epi ajì. E, si nou fè sa, mwen konnen n ap jwenn kouraj, paske Bondye vle nou gen kè kontan.

Nou se pitit Papa nou ki nan Syèl la, Li vle fè pati lavi nou, pou beni nou, ak pou ede nou. L ap geri blesi nou yo, siye dlo nan je nou, epi ede nou toutolon chemen nou pou nou retounen nan prezans Li a. Lè nou leve tèt nou gade li, l ap dirije nou.

Christ est ma lumière; en lui seul j'ai foi

Le jour et la nuit il est prêt de moi. . . .

Tue s ma joie et mon chant.

Le jour et la nuit tu guides mes pas. . . .constamment.¹²

Mwen rann temwanyaj mwen ke peche nou yo ap padone e fado nou yo ap vin lejè lè nou leve tèt nou gade Kris la. “An nou sonje li, . . .e pa pann tèt nou,”¹³ paske, jan Prezidan Monson di a, “Li pi bon pou nou gade anlè.”

Mwen temwanye Jezi se Sovè nou ak Redanmtè nou nan non Jezikri, amèn.

Nòt

1. Mozya 4:9.
2. Gade 2 Nefi 25:23; 26.
3. Gade Mozya 24:15.
4. Gade Nonb 21:8--9.
5. Gade 1 Nefi 17:41.
6. Alma 33:21--22; gade vèsè 19--20 tou.
7. Gade Alma 36:3, 17--21; 3 Nefi 9:13.
8. Gade Doktrin ak Alyans 20:77.
9. Egzòd 13:21.
10. Gade 2 Nefi 9:52; 31:13; Doktrin ak Alyans 121:46.

11. Pwovèb 20:12.

12. “Christ est ma lumière,” *Cantiques*, no. 50.

13. 2 Nefi 10:20.